

CONVENIO DE COLABORACIÓN ENTRE A AXENCIA PARA A MODERNIZACIÓN TECNOLÓXICA DE GALICIA E A FEDERACIÓN GALEGA DE ASOCIACIÓN UNIVERSITARIAS SÉNIORS PARA A EXECUCIÓN DO PROGRAMA FORMATIVO “BANCA DIXITAL SÉNIOR 2024”, ORIENTADO A FOMENTAR O USO DA TECNOLOXÍA LIGADA Á BANCA DIXITAL ENTRE O COLECTIVO DE PERSOAS MAIORES

Santiago de Compostela,

REUNIDOS

Dunha parte, **don Julián Cerviño Iglesia**, director da Axencia para a Modernización Tecnolóxica de Galicia, (co NIF Q1500382E), actuando en nome e representación da dita Axencia, en virtude das facultades conferidas polo Decreto 252/2011, do 15 de decembro, polo que se crea a Axencia para a Modernización Tecnolóxica de Galicia e se aproban os seus estatutos e o Decreto 149/2022, do 1 de setembro, polo que se nomea director da Axencia para a Modernización Tecnolóxica de Galicia.

Doutra parte, **don Alejandro Otero Davila**, presidente da Federación Galega de Asociacións Universitarias Sénior, (co NIF G70175666), actuando en nome e representación da citada Federación, con sede na Avenida Xoan XXIII, s/n, Campus Norte, Facultade de Enfermería, 15704, Santiago de Compostela (A Coruña), no uso das facultades que lle son atribuídas polo capítulo II artigo 14 dos vixentes Estatutos da federación (aprobados pola Asemblea Xeral ordinaria o 26 de abril de 2019) e en virtude do seu nomeamento pola Asemblea Xeral do 15 de outubro de 2021.

Todas as partes comparecen en nome e representación das súas respectivas institucións, recoñecendo de modo recíproco capacidade xurídica, lexitimidade, suficiencia e vixencia das súas respectivas facultades para subscribir o presente convenio e na súa virtude,

EXPOÑEN

Primeiro. Que, segundo o artigo 9 do estatuto da Axencia para a Modernización Tecnolóxica de Galicia (en diante Amtega) aprobado polo Decreto 9/2021, do 21 de xaneiro, polo que se suprime o Centro Informático para a Xestión Tributaria, Económico-Financeira e Contable (Cixtec), que modifica o Decreto 252/2011, do 15 de decembro, polo que se crea a Axencia para a Modernización Tecnolóxica de Galicia e se aproban os seus estatutos, a Amtega ten entre as súas competencias a dirección e xestión de todas as actuacións da Xunta en materia de tecnoloxías da información e as comunicacións e o deseño e liderado de iniciativas que contribúan a impulsar o desenvolvemento da Sociedade da información en Galicia, garantindo os dereitos dos cidadáns e eliminando as barreiras que se opoñan á expansión e ao uso das novas tecnoloxías.

Así mesmo, de acordo co artigo 5 do Decreto 252/2011, do 15 de decembro, polo que se crea a Axencia para a Modernización Tecnolóxica de Galicia e se aproban os seus estatutos, queda desconcentrada no titular da Dirección da Amtega a competencia para subscribir con entidades públicas e privadas, en nome da Amtega, convenios de colaboración excluídos da lexislación de contratos do sector público.



Segundo. Que a Federación Galega de Asociacións Universitarias Sénior, (en diante FEGAUS) ten entre os seus fins apoiar e defender un modelo aberto e participativo de formación continua ao longo de toda a vida.

Terceiro. Que a Xunta de Galicia persegue dotar ao conxunto da cidadanía das competencias dixitais necesarias para desenvolverse plenamente con confianza e seguridade no actual contexto dixital, e para conseguilo, aposta polo desenvolvemento de iniciativas enfocadas na adquisición das habilidades necesarias para que toda a sociedade poida beneficiarse das vantaxes da nova economía dixital, fomentando así a igualdade de oportunidades a través da aplicación dun modelo global e universal de inclusión dixital que permita a calquera persoa avanzar, madurar e acceder a maiores niveis de coñecemento e uso das TIC.

Cuarto. Que o Consello da Xunta aprobou o 3 de decembro de 2020 a Estratexia Galicia Dixital 2030 co obxectivo de configurar un futuro dixital para todos e todas, contribuíndo ao aumento da calidade de vida e ao desenvolvemento sostible nas súas tres vertentes: económica, social e medio ambiental. E o segundo eixo estratéxico desta estratexia persegue acadar unha sociedade dixital e inclusiva.

Neste sentido, perséguese a posta en marcha de actuacións que poñan especial atención nos colectivos en risco de exclusión dixital por ser máis vulnerables á fenda dixital, buscando fomentar a autonomía persoal, o envellecemento activo e a seguridade e confianza na rede mediante o uso das TIC, para vertebrar e cohesionar socialmente os contornos locais, e en especial as zonas rurais respecto ás urbanas.

Quinto. Que o 2 de febreiro de 2023 o Consello de Xunta de Galicia acordou aprobar o Plan DigiTalent 2030: Camiña en Dixital para o impulso da Inclusión, Capacitación e Talento Dixital. E o primeiro eixo estratéxico do Plan DigiTalent 2030 conta cunha medida enfocada a aproveitando o potencial das tecnoloxías dixitais para desfrutar de todas as etapas da vida e enfrontar o envellecemento de xeito activo.

Nesta liña, impulsa actividades de experimentación e interacción e actuacións formativas e informativas para implicar e capacitar aos grupos de maior idade no eido dixital, exercendo de escaparate para presentar e dar visibilidade aos servizo dixitais, solucións e ferramentas tecnolóxicas a disposición da cidadanía.

Sexto. Que o 23 de decembro de 2021 se aprobou en Consello da Xunta de Galicia o Plan de reforma e ampliación da Rede de aulas CeMIT desenvolvido pola Axencia para a Modernización Tecnolóxica de Galicia (Amtega), para impulsar a capacitación dixital dos galegos.

O Plan busca asegurar que a cidadanía conta coas capacidades dixitais básicas para participar de forma efectiva no novo contexto dixital, propiciando unha mellor calidade de vida, a creación de oportunidades de emprego e a redución das fendas de participación existentes, en especial entre os colectivos máis vulnerables, fomentando a igualdade dixital.

Unha das liñas do plan céntrase ademais en intensificar a presenza no rural a través dun servizo de aula móbil que permitirá achegar a capacitación dixital a todos os puntos da xeografía galega.

Sétimo. Que están a desaparecer as oficinas bancarias do rural, polo que as persoas maiores non teñen acceso a servizos presenciais ligados ás súas xestións



financeiras. Consecuentemente este colectivo está obrigado a realizar os seus trámites bancarios en caixeiros ou de forma dixital a través da banca online, e non contan coa formación e coñecementos necesarios para poder realizar estas operacións baseadas na tecnoloxía, o que lles xera dependencia de terceiras persoas á hora de realizar as súas xestións bancarias, privándoos de autonomía.

É por iso que se identifica como necesario formar ás persoas maiores, con foco no rural e nas persoas máis vulnerables dentro deste colectivo, no uso da tecnoloxía e no coñecemento dos dispositivos que son empregados para a realización de trámites dixitais ligados á banca.

Formar ao colectivo de persoas maiores na utilización da banca online fomentará a súa autonomía e o seu envellecemento activo, contribuíndo a mellorar a súa participación da nova sociedade dixital e a evitar a soidade non desexada.

Oitavo. Que para acadar o obxectivo marcado de dotar ao conxunto da cidadanía das competencias dixitais necesarias para desenvolverse no actual contexto dixital, darase continuidade á colaboración que a Amtega e FEGAUS veñen mantendo dende hai anos como aliados dixitais do Plan de Inclusión Dixital de Galicia, agora relevado polo Plan DigiTalent 2030, para o desenvolvemento de actividades de capacitación dixital orientadas ás persoas maiores.

Nesta liña, poñendo o foco no colectivo das persoas maiores e na problemática identificada da falta de autonomía deste colectivo en canto ao emprego da banca dixital, perséguese poñer en marcha un conxunto de actividades entre as que se atoparían:

- Deseño e execución de actividades en liña e presenciais nas catro provincias galegas, que serán retransmitidas *online* en directo para formar ás persoas maiores, con especial foco na contorna rural. As ditas actividades abordarán paso a paso temáticas vencelladas ao uso da banca dixital, dos caixeiros automáticos e dos novos métodos de pago, entre outras. Destas sesións participarán entidades sociais e colaboradas de FEGAUS, outras asociacións de maiores de Galicia, os centros da Rede CeMIT e as asociacións que integran a Federación.
- Desenvolvemento e edición de vídeo-pílulas informativas de curta duración con foco en temáticas concretas tratadas nas sesións en liña e presenciais, favorecendo que as persoas maiores sen posibilidade de conectarse ás actividades formativas teñan acceso ao coñecemento nun formato máis breve e concentrado.
- Creación de podcasts vencellados ás anteditas temáticas formativas, para favorecer o acceso aos coñecementos a través de formatos auditivos.
- Posta en marcha de experiencias gamificadas que fomenten o desenvolvemento cognitivo dos participantes.
- Deseño e posta a disposición de infografías "paso a paso" e outros contidos descargables de soporte visual sobre as funcións da banca dixital.
- Deseño e execución dunha planificación de comunicación que permita dar a coñecer as accións enmarcadas no presente convenio ás persoas maiores en todos os puntos da xeografía galega. A planificación incluírá un Plan de comunicación integral que contará co apoio de institucións e entidades locais,



un Plan de comunicación eficiente en Medios Sociais e a celebración de unha xornada de presentación oficial de proxecto.

- Realización de rutas por pobos das catro provincias galegas desenvolvendo un itinerario de actividades presenciais para achegar aos maiores do contorno rural a tecnoloxía, e en concreto en temáticas ligadas á banca dixital. Nestas actuacións poderán participar entidades sociais e colaboradoras de FEGAUS e o seu desenvolvemento contará coa colaboración dos centros da Rede CeMIT, as asociacións que integran a Federación e outras asociacións de maiores de Galicia.

As actividades previstas só se poderán levar a cabo coa colaboración de FEGAUS por ser a única federación galega que agrupa ás 7 Asociacións de alumnos e ex-alumnos dos Programas de Maiores dos 7 Campus Universitarios galegos dende 2008, e que traballa desde entón para elevar os niveis educativos e culturais das persoas maiores a través da formación permanente. FEGAUS é polo tanto a entidade galega de referencia que conta cunha dilatada experiencia na formación TIC enfocada nun plan formativo definido por persoas maiores para atender as necesidades reais deste colectivo e que permite a calquera maior, independentemente do seu lugar de residencia, ter as mesmas ou similares oportunidades respecto daqueles que residen nas grandes cidades.

É evidente pois, que a achega económica da Amtega ao abeiro do presente convenio ten un carácter de interese público, de acordo co artigo 26.2 da Lei 9/2007, do 13 de xullo, de subvencións de Galicia, porque contribuirá a:

- Desenvolver plans de formación que fomenten a adquisición de competencias dixitais por parte da cidadanía.
- Resolver a problemática identificada entre o colectivo das persoas maiores en canto ao emprego dun modo independente da banca dixital.
- Fomentar a autonomía das persoas maiores, con foco no rural e nas persoas en situación de maior vulnerabilidade dentro deste colectivo, apoiándoas e acompañándoas no coñecemento das funcionalidades da banca en liña, promovendo así a súa autonomía, independencia e o envellecemento activo.
- Difundir e divulgar as vantaxes de contar con competencias dixitais no actual contexto de transformación dixital.
- Incorporar a accesibilidade como condición indispensable das actuacións.
- Incrementar os contidos divulgativos en galego en Internet.

Salientar ademais que existe correspondencia entre os obxectivos da FEGAUS e os que constitúen o obxecto do presente convenio.

Por todo o exposto, considérase de grande interese a colaboración das partes asinantes, non sendo posible promover a concorrência pública resultando, polo tanto, de aplicación o artigo 26.2 da Lei 9/2007, do 13 de xullo, de subvencións de Galicia.

A achega económica outórgase ao amparo do disposto no Regulamento (CE) 2023/2831 da Comisión, do 13 de decembro de 2023, relativo á aplicación dos artigos 107 e 108 do Tratado de funcionamento da Unión Europea ás axudas de minimis (DOUE-L-2023-81820)..



En consecuencia, a Amtega e a FEGAUS acordan subscribir o presente convenio de colaboración con base nas seguintes:

CLÁUSULAS

Primeira. Obxecto

O presente Convenio de Colaboración entre a Amtega e a FEGAUS ten por obxecto a realización de actuacións de formación e capacitación dirixidas ao colectivo de persoas maiores para formalo na utilización da tecnoloxía ligada á banca dixital.

Este convenio enmárcase dentro das accións definidas na Estratexia Galicia Dixital 2030 e o Plan DigiTalent 2030: Camiña en Dixital.

Segunda. Colectivo beneficiario e obxectivo de participación

O proxecto persegue formar ao colectivo de persoas maiores, con foco naquelas que residen en zonas rurais. Ademais prestarase especial atención ás persoas maiores con deterioro cognitivo, dependentes e en situación de especial vulnerabilidade.

Coa realización do proxecto e a través da execución de todas as actividades a desenvolver no seo do mesmo perséguese acadar, de xeito estimativo, a colaboración directa con, cando menos 10 centros, e a formación de máis de 4.500 participantes potenciais en 2024.

Terceira. Descrición das actuacións

As actuacións que se desenvolverán en base a este Convenio de Colaboración son as seguintes:

- 1) Sesións de inspiración. Levaranse a cabo 5 actividades formativas online de 60 minutos de duración nas que se explicarán paso a paso temáticas relacionadas coa banca dixital. As formacións abordarán, entre outras, as seguintes temáticas: aplicacións móbiles para a xestión das finanzas, comunicación efectiva coas entidades bancarias na época actual, e a realización de pagos co móbil no comercio e hostalería. As temáticas a impartir serán complementarias ás do programa formativo impartido no 2022.
As sesións formativas desenvolveranse presencialmente en localidades que perderon caixeiros automáticos e nas que durante 2022 non se celebrou ningunha sesión formativa presencial.
- 2) Videopílulas. Desenvolveranse e editaranse 15 videopílulas sobre temáticas concretas, nun formato breve de entre 10 e 15 minutos no que se condensará a información máis importante de cada actividade, co obxectivo de achegar a formación ás persoas maiores de contornas rurais que non poden acceder ás sesións formativas en directo ou acceder ás súas gravacións en diferido.
- 3) Podcast. Elaborarase 1 podcast sobre un dos temas principais tratados nas sesións de inspiración, que versará sobre contidos diferentes e complementarios aos dos podcast realizados no 2022. O podcast facilitará o acceso ao coñecemento a través de contido auditivo en formato de píluila formativa en arquivo mp3, accesible desde o móbil ou desde o ordenador. Este formato adquire especial relevancia no caso das persoas maiores que



non teñen posibilidade de asistir ás clases en directo ou que teñen algún tipo de limitación visual.

- 4) Xogos. Realizarase 1 experiencia gamificada para fomentar o desenvolvemento cognitivo dos participantes, co obxectivo de minimizar o impacto negativo da deterioración cognitiva sufrida polas persoas en situacións de soidade non desexada e de dependencia de longa duración. Planificarase unha dinámica diferente á das experiencias gamificadas de anteriores edicións para sorprender ao usuario e impulsar a súa participación, reforzando a asimilación dos contidos impartidos nas sesións de inspiración e o podcast.

O itinerario de actividades presenciais a desenvolver en 2024 realizarase a través de rutas por zonas rurais das catro provincias galegas. Ditas actividades serán emitidas en directo a través de Internet, co obxectivo de achegarse de forma específica e a través da tecnoloxía aos maiores das contornas rurais, estendendo o seu alcance a través da participación das Entidades Sociais e colaboradoras de FEGAUS, así como os Centros CeMIT, as asociacións que integran a Federación e outras asociacións de maiores de Galicia.

Todas as actividades serán gravadas e quedarán dispoñibles na Videoteca da FEGAUS para a súa visualización polas persoas beneficiarias das accións formativas, en calquera momento e tantas veces como se requira.

Todos os contidos online serán accesibles e inclusivos e estarán dispoñibles para toda a cidadanía, tanto en web multidispositivo como en app móbil.

Outros materiais complementarios descargables

Elaboraranse contidos dixitais en soporte visual que se porán a disposición dos usuarios para a súa descarga, como infografías, para facilitar a comprensión das nocións impartidas nas sesións formativas sobre as funcións de banca dixital.

Este tipo de materiais están enfocados a facilitar a aprendizaxe e consolidación dos contidos con axuda de familiares e cuidadores das persoas maiores beneficiarias da formación, para que poidan acompañalas e darlles soporte durante o proceso formativo.

Actuacións de comunicación

No seo do proxecto levaranse a cabo as seguintes actuacións de comunicación e difusión:

- 1) Deseño e execución dun Plan de comunicación integral que, a través do apoio de institucións e entidades locais, permita chegar a todos os puntos da xeografía galega.
- 2) Deseño e execución dun Plan de comunicación eficiente nos Medios Sociais, dado o incremento do seu uso polas persoas séniors.
- 3) Celebración dunha xornada presentación oficial do proxecto para as Asociacións Colaboradoras, as Asociacións de Universitarios Séniors dos 7 Campus de FEGAUS e aos usuarios séniors.

Cuarta. Calendario de execución



As actuacións formativas a celebrar no seo do proxecto deberán ser executadas antes do prazo de xustificación do convenio.

Quinta. Obrigas da FEGAUS

Co fin de garantir a execución do obxecto do presente convenio, a FEGAUS estará obrigada a:

- Realizar directamente ou en colaboración con outras entidades, as actuacións establecidas neste convenio debendo proceder, en consecuencia, á asignación dos medios humanos e materiais que sexan necesarios e, de ser o caso, á contratación das colaboracións externas que se precisen para o seu desenvolvemento.
- Cumprir co disposto no artigo 11 da lei 9/2017 de subvencións de Galicia.
- Seguir as normas sobre confidencialidade de datos, concretamente a Lei Orgánica 3/2018, do 5 de decembro, de Protección de Datos Persoais e garantía dos dereitos dixitais e as normas que a desenvolven.
- Axustarse ás normas de seguridade e de imaxe corporativa, no seu caso, establecidas pola Xunta de Galicia.
- Achegar os informes e documentos que acrediten de xeito fidedigno o desenvolvemento das actividades do presente convenio, así como os informes e demais documentos requiridos pola Amtega.
- Entregar todo o material elaborado dentro do marco deste convenio de acordo co establecido na cláusula vixésimo primeira relativa a Dereitos de explotación e propiedade intelectual baixo licenza Creative Commons BY-SA (Recoñecemento – Compartir Igual).
- Facer figurar á Amtega como colaboradora do proxecto na totalidade das actuacións asociadas a este Convenio.
- Ser titular e suxeito pasivo de todas as obrigas tributarias e sociais e de calquera outra índole que se deriven da aplicación do ordenamento xurídico vixente.
- Facilitar a inspección e control dos órganos da Amtega co obxecto de supervisar o cumprimento das actividades previstas no convenio e que permitan a esta a xustificación financeira perante a Intervención Xeral da Comunidade Autónoma e o Tribunal de Contas, así como as comprobacións previstas na lexislación do Consello de Contas.
- Facilitar toda a información que lle sexa requirida pola Intervención Xeral da Comunidade Autónoma, polo Tribunal de Contas e polo Consello de Contas no exercicio das súas funcións de fiscalización e control do destino das subvencións.
- A FEGAUS comprométese a xustificar ante a Amtega todas as actuacións que se realicen ao abeiro do presente convenio.
- A FEGAUS quedará sometida aos procedementos de control establecidos. A achega económica outórgase ao amparo do disposto no Regulamento (CE) 2023/2831 da Comisión, do 13 de decembro de 2023, relativo á aplicación dos artigos 107 e 108 do Tratado de funcionamento da Unión Europea ás axudas de minimis (DOUE-L-2023-81820).



Doutra banda, FEGAUS presentou, previamente á sinatura do presente convenio, de xeito electrónico a través do procedemento PR601A habilitado ao efecto na Sede Electrónica da Xunta de Galicia:

- Declaración responsable de non estar incurso en ningunha das prohibicións para a obtención de subvencións contempladas no artigo 10.2 da Lei 9/2007, do 13 de xuño, de subvencións de Galicia. A acreditación de non estar incurso nas ditas prohibicións realizouse mediante declaración responsable do seu representante legal.
- Declaración sobre calquera outra axuda *de minimis* recibida durante os últimos tres anos (artigo 3.2 do regulamento *de minimis*).
- Declaración de "outras axudas solicitadas, tanto as aprobadas ou concedidas como as pendentes de resolución (para os mesmos gastos subvencionables), das distintas administracións públicas ou calquera dos seus organismos, entes ou sociedades".
- Autorización á Amtega para solicitar as certificacións emitidas pola Axencia Estatal da Administración Tributaria, a Tesouraría Xeral da Seguridade Social e a Axencia Tributaria de Galicia, que acreditan que a entidade se atopa ao corrente das súas obrigas. A dita autorización estará en vigor durante a vixencia do presente convenio.
- Non obstante o anterior, a FEGAUS poderá revogar expresamente dito consentimento en calquera momento.

Sexta. Gastos subvencionables

Con carácter xeral, e de acordo co establecido no artigo 29 da Lei 9/2007, do 13 de xuño, de subvencións de Galicia, consideraranse gastos subvencionables aqueles que, de xeito indubidable, respondan á natureza da actividade subvencionada e se realicen dentro do período comprendido entre o 1 de xaneiro de 2024 e a data límite de xustificación do convenio.

Os custos tales como dietas, viaxes, consumibles, formarán parte da xustificación da subvención, sempre que sexan imputados pola FEGAUS á actividade subvencionada e, en todo caso, na medida na que tales custos correspondan ao período no que efectivamente se realiza a actividade obxecto do convenio ou a súa preparación previa.

O importe do IVE non se considerará gasto subvencionable cando sexa susceptible de recuperación ou compensación, salvo que se acredite a exención do mesmo e consecuentemente non resulte recuperable para o beneficiario.

Os gastos xerais da FEGAUS vinculados directamente á execución das actuacións recollidas na cláusula terceira poderán imputarse con cargo ao presente convenio, ata un límite do 10% do total da subvención establecida nesta cláusula.

De conformidade co establecido no artigo 29.3 da Lei 9/2007, do 13 de xuño, de subvencións de Galicia, cando o importe do gasto subvencionable supere as contías establecidas na Lei 9/2017, do 8 de novembro, Contratos do Sector Público, para o contrato menor, o beneficiario deberá solicitar como mínimo tres ofertas de diferentes provedores, con carácter previo á contratación do compromiso para a obra, a prestación do servizo ou a entrega do ben, agás que polas súas especiais características non exista no mercado suficiente número de entidades que as



realicen, presten ou subministren ou agás que o gasto se tivese realizado con anterioridade á solicitude da subvención.

En ningún caso o custo de adquisición dos gastos subvencionables poderá ser superior ao valor do mercado.

Considérase gasto realizado o que foi efectivamente pagado con anterioridade á finalización do período de xustificación determinado neste convenio.

A achega económica outórgase ao amparo do disposto no Regulamento (CE) 2023/2831 da Comisión, do 13 de decembro de 2023, relativo á aplicación dos artigos 107 e 108 do Tratado de funcionamento da Unión Europea ás axudas de minimis (DOUE-L-2023-81820), quedando condicionada polo establecido na normativa comunitaria sobre esta materia.

O orzamento estimado de gasto para o desenvolvemento das actuacións previstas no convenio é o seguinte:

Proxecto	Importe
Programa formativo "Banca dixital Sénior"	15.000€
TOTAL:	15.000€

Sétima. Dirección, medios humanos e materiais

A FEGAUS, co obxecto de garantir a adecuada execución das actuacións deste convenio, comprométese a asumir a súa dirección, debendo proceder, en consecuencia á asignación de medios humanos e materiais que sexan necesarios e, no seu caso, a subcontratación dos servizos precisos para levar a cabo as actuacións establecidas no presente convenio, que en todo caso, se realizarán de acordo co establecido no artigo 27 da Lei 9/2007, do 13 de xuño, de subvencións de Galicia, podendo acadar o custo total da actividade proposta.

En todo caso, de acordo co artigo 43.3 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, a Amtega poderá comprobar, dentro do período de prescrición, o custo e o valor de mercado das actividades subcontratadas.

No caso de cesión de datos, a entidade subcontratada cumprirá as esixencias da Lei Orgánica 3/2018, do 5 de decembro, de Protección de Datos Persoais e garantía dos dereitos dixitais, adoptándose tanto as medidas de seguridade técnicas como organizativas.

Oitava. Orzamento e obrigas da Amtega

A Amtega financiará as accións do presente convenio, ata un máximo de QUINCE MIL EUROS (15.000 €), con cargo á partida orzamentaria 07.A1.571A.781.0 dos orzamentos xerais da Comunidade Autónoma de Galicia para o 2024.

O financiamento das actuacións obxecto do presente convenio será compatible con outras axudas establecidas por outra Administración Pública, organismo ou ente público ou privado, nacional ou internacional para o mesmo fin.



O importe das axudas en ningún caso poderá ser de tal contía que, illadamente ou en concorrencia con outras subvencións, axudas, ingresos ou recursos, supere o custe da actividade subvencionada.

O aboamento da achega antedita realizarase unha vez que se xustifique a realización das actividades descritas neste convenio.

Novena. Xustificación

A FEGAUS presentará ante a Amtega a xustificación da subvención. O prazo para presentar a xustificación finaliza o 31 de outubro de 2024. Presentarase a seguinte documentación xustificativa a través do procedemento PR601A habilitado ao efecto na Sede Electrónica da Xunta de Galicia:

- Solicitud de libramento.
- Excepcionalmente, no caso de que o solicitante revogase expresamente a autorización ao órgano xestor para que solicite de oficio os certificados de que está ao día nas súas obrigas, deberá achegar certificacións de estar ao corrente das obrigas tributarias estatais, coa Axencia Tributaria de Galicia e coa Seguridade Social.
- Memoria de actuación xustificativa do cumprimento das condicións impostas neste convenio, con indicación do total das actividades realizadas, resultados obtidos e os datos e incidencias máis salientables na súa execución.
- Relación clasificada dos gastos e investimentos da actividade, con identificación do acredor e do documento, o seu importe, data de emisión e, no seu caso, data de pagamento. Esta relación presentarase en formato PDF e así mesmo nun formato de folla de cálculo ODS de LibreOffice, para facilitar a súa revisión.
- Xustificación dos gastos realizados: orixinais ou copias auténticas das facturas ou dos documentos de valor probatorio equivalente no tráfico xurídico mercantil ou con eficacia administrativa incorporados na relación a que se fai referencia no parágrafo anterior emitidas dentro do período comprendido entre o 1 de xaneiro de 2024 e a data límite de xustificación.
- Xustificación dos pagamentos efectuados: transferencia bancaria, certificación bancaria orixinal ou extracto de pagamento comprendido entre o 1 de xaneiro de 2024 e a data límite da xustificación. Nestes documentos deberán quedar claramente identificados o/a receptor/a, o/a emisor/a e o concepto do pagamento. Non se admitirán pagamentos en efectivo.
- Declaración sobre calquera outra axuda de minimis recibida durante os últimos tres anos (artigo 3.2 do regulamento de minimis).
- Declaración do conxunto de axudas solicitadas, tanto as aprobadas ou concedidas como as pendentes de resolución, para o mesmo proxecto, das administracións públicas competentes ou das súas entidades vinculadas ou dependentes así como dos entes privados. Nesta declaración, se é o caso, deberá figurar unha relación detallada doutros ingresos ou subvencións financian a actividade subvencionada con indicación do importe e a súa procedencia.



- Declaración responsable relativa á titularidade da conta onde se debe realizar o pagamento, e na que conste a razón social e NIF, así como así como o código internacional de conta bancaria (código IBAN).
- Declaración expresa do beneficiario de que as persoas ou entidades contratadas e/ou subcontratadas para as actividades subvencionadas non estean vinculadas con el, de conformidade co artigo 27.7.d) da Lei 9/2007, do 13 de xuño, de subvencións de Galicia e no seu regulamento de desenvolvemento.
- No caso de estar exento do imposto sobre o valor engadido (IVE), documentación acreditativa da mencionada exención.
- Entregar cubertas as táboas de recompilación de datos que aparecen recollidas no Anexo I do presente convenio.
- Calquera outra documentación ou material que o beneficiario considere necesario presentar para unha mellor xustificación das actuacións obxecto do presente convenio.

En todo caso, a Amtega resérvase o dereito de solicitar toda a documentación que se considere precisa en relación coa realización das actuacións obxecto do presente convenio e calquera outra que estime oportuna para a correcta xustificación do gasto e o seu pagamento.

Décimo. Pagamento

O aboamento da achega económica realizarase a medida que se xustifique a realización das actividades descritas neste convenio, mediante pagamentos parciais á conta da liquidación por importe non superior ao 80% da porcentaxe subvencionada correspondente aos pagamentos xustificados, de conformidade co disposto no artigo 62 do Decreto 11/2009, do 8 de xaneiro.

Adicionalmente, con carácter xeral, e previa solicitude, poderá procederse a un anticipo de ata o 50% do importe máximo de financiamento que serán concedidos mediante resolución motivada nas condicións establecidas no artigo 31.6 da Lei 9/2007 e nos artigos 62.2 e 63 do Decreto 11/2009. O prazo para presentar a solicitude do anticipo rematará o 30 de setembro de 2024.

O importe conxunto dos pagamentos á conta e dos pagamentos anticipados non poderá ser superior ao 80% da porcentaxe subvencionada correspondente aos pagamentos xustificados, de conformidade co disposto no artigo 62.2 do Decreto 11/2009, do 8 de xaneiro..

Con referencia ao establecido no artigo 62.3 do Decreto 11/2009, cómpre establecer que quedan exonerados da constitución da garantía as entidades non lucrativas, así como as federacións, confederacións ou agrupacións destas, que desenvolvan proxectos ou programas de accións social ou cooperación internacional, de acordo co artigo 65º.4.h) do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.

O importe restante pagarase unha vez xustificada e realizada a totalidade da actividade subvencionada.

O pagamento realizarase sempre previo informe de conformidade da Área de Sociedade Dixital da Amtega e, no seu caso, comprobación material do investimento



de conformidade co artigo 30, puntos 2 e 3, da Lei 9/2007, do 13 de xuño, de subvencións de Galicia.

Décimo primeira. Minoración da subvención

Procederá a minoración da subvención concedida cando as actuacións desenvolvidas e xustificadas ao abeiro do presente convenio teñan un custo inferior ao orzamento establecido no seu clausulado, e sempre que esta minoración non supoña unha realización deficiente do proxecto. Producirase a perda do dereito ao cobramento parcial polo importe de minoración da subvención.

Décimo segunda. Reintegro

Procederá o reintegro parcial ou total dos fondos percibidos no suposto de incumprimento das condicións establecidas para a súa concesión nos termos previstos no Título II da Lei 9/2007, do 13 de xuño, de subvencións de Galicia.

Así mesmo, ao abeiro do disposto no artigo 14.1.n) da Lei 9/2007, os criterios de gradacións dos posibles incumprimentos para determinar a cantidade a minorar serán os seguintes:

- a) O incumprimento total dos fins para os que se concedeu a axuda, da realización dos gastos subvencionables, ou da obriga de xustificación, dará lugar á perda do dereito ao cobro, ou no seu caso, ao reintegro da totalidade da axuda concedida.
- b) Calquera outro incumprimento considerarase incumprimento parcial dos fins para os que se concedeu a axuda, da realización do investimento subvencionable ou da obrigación de xustificación e dará lugar á perda do dereito ao cobro ou, no seu caso, na porcentaxe correspondente ao investimento non efectuado ou non xustificada.
- c) A realización de modificacións non autorizadas no orzamento subvencionable, suporá a perda do dereito ao cobro.

Terán a consideración de infraccións leves as establecidas no artigo 54 da Lei 9/2007, do 13 de xuño, de subvencións de Galicia, que poderá dar lugar ás sancións pecuniarias establecidas no artigo 59 da devandita Lei 9/2007.

As infraccións graves e moi graves en materia de subvencións, recollidas nos artigos 55 e 56 respectivamente da Lei 9/2007, poderán dar lugar ás sancións previstas no artigo 60 e 61 respectivamente.

Décimo terceira. Notificacións

1. As notificacións de resolucións e actos administrativos practícaranse só por medios electrónicos, nos termos previstos na normativa reguladora do procedemento administrativo común.

2. As notificacións electrónicas realizaranse mediante o Sistema de Notificación Electrónica de Galicia – Notifica.gal dispoñible a través da sede electrónica da Xunta de Galicia (<https://sede.xunta.gal>). Este sistema remitirá ás persoas interesadas avisos da posta a disposición das notificacións á conta de correo e/ou teléfono móbil que consten na solicitude para efectos de notificación. Estes avisos non terán, en ningún caso, efectos de notificación practicada e a súa falta non impedirá que a notificación sexa considerada plenamente válida.



3. No caso de persoas interesadas que, de acordo coa normativa básica, estean obrigadas a relacionarse a través de medios electrónicos coa administración, deberán crear e manter o seu enderezo electrónico habilitado único a través do Sistema de Notificación Electrónica de Galicia, para todos os procedementos administrativos tramitados pola Administración xeral e do sector público autonómico. En todo caso, a Administración xeral poderá de oficio crear o indicado enderezo, aos efectos de asegurar o cumprimento polos indicados interesados da súa obriga de relacionarse por medios electrónicos.

4. As notificacións por medios electrónicos entenderanse practicadas no momento en que se produza o acceso ao seu contido. Cando a notificación por medios electrónicos sexa de carácter obrigatorio, ou fose expresamente elixida polo interesado, entenderase rexeitada cando transcorresen dez días naturais desde a posta á disposición da notificación sen que se acceda ao seu contido.

5. Se o envío da notificación electrónica non fose posible por problemas técnicos, a Administración xeral e do sector público autonómico de Galicia practicará a notificación polos medios previstos na normativa reguladora do procedemento administrativo común.

Décimo cuarta. Vixencia

O presente convenio entrará en vigor na data da súa sinatura e terá vixencia ata o 31 de decembro de 2024.

Décimo quinta. Comisión de seguimento

Para velar polo cumprimento do estipulado, constituirase unha comisión paritaria de seguimento da execución do convenio, formada por dous representantes da Amtega e dous representantes da FEGAUS, que actuará como órgano de vixilancia, seguimento e control do establecido neste convenio, promovendo, se o considera adecuado, outras actuacións que poidan enriquecer o seu desenvolvemento. A composición da dita comisión será a seguinte:

- Pola Amtega, a persoa titular da súa Dirección, ou persoa na que delegue, e a persoa titular da Dirección da Área de Sociedade Dixital, ou persoa que a substitúa.
- Pola FEGAUS, a persoa titular da súa presidencia e a persoa titular da súa secretaría, ou persoas nas que deleguen.

Esta comisión estará presidida pola persoa titular da Dirección da Amtega, que terá voto de calidade, e reunirse en todas as ocasións que se estimen oportunas.

Décimo sexta. Publicidade

A FEGAUS consente expresamente a inclusión dos datos relevantes deste convenio nos rexistros públicos que proceda, de acordo coa Disposición Adicional do Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia e no Decreto 126/2006, do 20 de xullo, polo que se regula o Rexistro de Convenios da Xunta de Galicia. Así como tamén se compromete a facilitar toda a información requirida ao abeiro do artigo 4 da Lei



1/2016, de 18 de xaneiro, de transparencia e bo goberno. En caso de incumprimento desta obriga, estarase ao disposto no punto 4 do artigo citado.

De conformidade coa Lei 38/2003, do 17 de novembro, o instrumento de colaboración e a información sobre a subvención serán comunicadas á Base de datos nacional de subvencións (BDNS).

Este convenio será obxecto de inscrición en cumprimento do establecido no artigo 15 da Lei 1/2016, de 18 de xaneiro, de transparencia e bo goberno.

As partes asinantes autorizan e consenten a publicidade dos seus datos persoais e demais especificacións recollidas no presente instrumento de colaboración no Portal de Transparencia e Goberno Aberto.

Segundo o artigo 17 da Lei 1/2016, do 18 de xaneiro, ademais da información que debe facerse pública segundo a normativa básica en materia de transparencia, a Administración autonómica publicará o texto íntegro do convenio.

Décimo sétima. Resolución

O presente convenio resolverase por incumprimento total ou parcial dalgunha das cláusulas que o regulan ou polo transcurso do tempo estipulado sen que se realicen os investimentos.

Así mesmo, poderase resolver por denuncia unilateral de calquera das partes previa comunicación á outra parte cun mes de antelación.

Décimo oitava. Modificación da concesión

1. No caso de alteración das condicións tidas en conta neste convenio, poderá ser modificado por acordo das partes, a través da formalización da correspondente Addenda.

2. Así mesmo, cando por circunstancias técnicas sexa imprescindible variar o contido específico dos investimentos ou os prazos recollidos no presente convenio, as partes poderán acordar a modificación do convenio a través da formalización da correspondente Addenda, sempre que se cumpran os seguintes requisitos:

- a) Que a actividade, conduta ou modificación do proxecto estea comprendida dentro do obxecto deste convenio de colaboración.
- b) Que se acredite a inexistencia de prexuízo a terceiros/as.
- c) Que os novos elementos e as circunstancias que motiven a modificación, de teren concorrido na concesión inicial, non supuxesen a denegación da axuda ou subvención.

Décimo novena. Inexistencia de relación laboral



A subscrición do presente convenio non implicará relación laboral, contractual ou de calquera outro tipo entre os profesionais que realicen as actividades obxecto deste convenio e a Amtega.

Vixésima. Interpretación

O presente convenio ten natureza administrativa, e como tal, queda excluído do ámbito de aplicación da Lei 9/2017, do 8 de novembro, de contratos do sector público (artigo 6.2), se ben se observarán os seus principios para a resolución das dúbidas e lagoas que se puidesen presentar.

Rexerase polas súas propias cláusulas e supletoriamente, polas normas xerais do dereito administrativo.

A Amtega ostenta a prerrogativa de interpretar, e resolver todas as dúbidas que xurdan na súa execución, de acordo co réxime xurídico legalmente aplicable.

Vixésimo primeira. Dereitos de explotación e propiedade intelectual

A documentación e o material elaborado dentro do marco deste convenio deberá poñerse a disposición pública con licenzas de documentación libres aprobadas pola Free Software Foundation ou a Open Source Initiative, preferentemente coa licenza Creative Commons Recoñecemento – Compartir Igual (CC-BY-SA).

A FEGAUS debe garantir que obtivo, no caso de ser necesario, o permiso dos titulares dos dereitos de propiedade intelectual ou do seu representante legal, para utilizar fragmentos de textos, ilustracións, mapas, sons, vídeos, gráficos ou outros elementos incluídos na obra ou obras entregadas.

A FEGAUS deberá facer dispoñible, no caso de que a obra final sexa obtida mediante compilación ou procesamento dun ficheiro fonte ou varios, todos os ficheiros necesarios para xerar a obra, baixo as mesmas condicións que a propia obra.

A obra debe empregar formatos e estándares abertos e non deben existir restricións técnicas ou outro tipo de restricións ou limitacións que limiten as liberdades de uso, estudo, copia, cambios, realización de melloras, distribución total ou parcial da obra e das súas modificacións.

De ser o caso, o código fonte das aplicacións desenvolvidas no ámbito deste convenio deberán poñerse a disposición pública cunha licenza compatible coa definición de Software Libre ou de Fontes Abertas segundo o Real Decreto 4/2010, do 8 de xaneiro polo que se regula o Esquema Nacional de Interoperabilidade no ámbito da Administración Electrónica, asegurando que os programas, datos ou información que se comparten:

- a) Poden executarse para calquera propósito.
- b) Permiten coñecer o seu código fonte.
- c) Poden modificarse ou mellorarse.
- d) Poden redistribuírse a outros usuarios con ou sen cambios sempre que a obra derivada manteña estas mesmas catro garantías.



A FEGAUS resérvase o dereito de publicar os resultados, parciais ou finais, obtidos durante a execución do convenio facendo constar o financiamento da Amtega.

Calquera que sexa o medio de difusión, ambas partes comprométense a facer mención expresa do presente convenio.

Vixésimo segunda. Protección de datos persoais

As partes asinantes virán obrigadas en materia de protección de datos a cumprir co Regulamento (UE) 2016/679 do Parlamento Europeo e do Consello de 27 de abril de 2016, relativo á protección das persoas físicas no que respecta ao tratamento de datos persoais e a libre circulación destes datos e polo que se derroga a Directiva 95/46/CE (Regulamento xeral de protección de datos), a Lei Orgánica 3/2018, do 5 de decembro, de Protección de Datos Persoais e garantía dos dereitos dixitais (en diante, LOPDGDD) e demais disposicións vixentes sobre a materia, adoptando as medidas que resulten necesarias para cumprir as súas previsións e, en particular, para garantir a seguridade e integridade dos datos e a súa protección fronte a alteracións, perdas, tratamentos ou accesos non autorizados.

1. Tratamento de datos persoais dos asinantes deste convenio

Os datos persoais dos asinantes deste convenio serán tratados por cada unha das partes co fin de xestionar a formalización e desenvolvemento do presente convenio, sendo imprescindible para iso que inclúan os seus datos identificativos, a representación da capacidade que ostenten, o número de DNI ou documento equivalente e a súa sinatura.

A base lexitimadora do tratamento dos datos dos asinantes é o cumprimento dunha misión de interese público baseada na Lei 40/2015, do 1 de outubro, de Réxime Xurídico do Sector Público e na necesidade de tratar os devanditos datos para a execución do convenio suscrito.

Respecto dos datos persoais sobre os que a Axencia para a Modernización Tecnolóxica de Galicia (Amtega) ostenta a condición de responsable do tratamento, as persoas interesadas poderán solicitar ante este o acceso, rectificación, supresión, así como outros dereitos a través da Sede Electrónica da Xunta de Galicia ou nos lugares e rexistros establecidos na normativa reguladora do procedemento administrativo común, segundo se recolle en <https://www.xunta.gal/exercicio-dos-dereitos>. Contacto co/a delegado/a de protección de datos e información adicional: <https://www.xunta.gal/informacion-xeral-proteccion-datos>.

En canto aos datos persoais sobre os que FEGAUS ostente a condición de responsable do tratamento, as persoas interesadas poderán solicitar da devandita entidade o acceso, rectificación e supresión dos seus datos, así como exercer outros dereitos segundo se recolle en <https://fegaus.com/aviso-legal/>.

Así mesmo, as partes garanten o cumprimento do deber de información previsto no artigo 13 do RXPD respecto do persoal ao seu servizo, propio ou alleo, cuxos datos persoais sexan comunicados entre as partes para o mantemento e cumprimento do convenio.



2. Tratamento de datos persoais facilitados por FEGAUS para a verificación das actuacións descritas no Convenio

A base lexitimadora para o tratamento dos datos persoais facilitados por FEGAUS á Amtega para o seguimento do Programa e a xustificación dos correspondentes gastos relativos ás actuacións que constitúen o obxecto do convenio, será o cumprimento dunha misión de interese público ou o exercicio de poderes públicos conferidos ao responsable do tratamento e o cumprimento dunha obrigaición legal, fundamentadas ambas no disposto no Regulamento (UE) 2021/241 do Parlamento Europeo e do Consello do 12 de febreiro de 2021 polo que se establece o Mecanismo de Recuperación e Resiliencia e na Lei 9/2007, do 13 de xuño, de subvencións de Galicia e na Lei 40/2015, do 1 de outubro, de Réxime Xurídico do Sector Público.

Os datos poderán ser comunicados á Dirección Xeral de Política Financeira, Tesouro e Fondos Europeos da Consellería de Facenda coa finalidade de realizar a xestión, seguimento, información, control, coordinación e estudo da execución e avaliación dos programas operativos dos fondos procedentes da Unión Europea na súa condición de organismo intermedio dos programas operativos en virtude das funcións atribuídas pola autoridade de xestión dos programas operativos segundo o disposto nos artigos 125, número 2, artigo 140, números 3 a 5, e anexo XIII, número 3, do Regulamento (UE) nº 1303/2013 e as súas disposicións de desenvolvemento. Así mesmo, os datos poderanse comunicar ás administracións estatais e europeas con competencia na materia.

As persoas interesadas poderán solicitar ante o responsable do tratamento o acceso, rectificación e supresión dos seus datos, así como opoñerse ao seu tratamento segundo se explicita en <https://www.xunta.gal/informacion-xeral-proteccion-datos>. Contacto Delegado/a de Protección de Datos e información adicional en <https://www.xunta.gal/informacion-xeral-proteccion-datos>.

FEGAUS obrígase a informar ás persoas interesadas, con carácter previo, da comunicación dos datos á Amtega ou para calquera outras entidades segundo o determine, así como da finalidade destas comunicacións.

3. Deber da confidencialidade das partes

Sen prexuízo do disposto na cláusula oitava deste convenio, as partes asinantes deberán respectar o segredo profesional e, en consecuencia, manter absoluta confidencialidade e reserva sobre a totalidade dos documentos, datos e informacións que lle sexan confiados para a formalización e desenvolvemento do presente convenio. Así mesmo, quedan expresamente obrigados:

- A utilizar a devandita información exclusivamente no ámbito deste convenio e para as finalidades previstas nel;
- A non comunicala, nin total nin parcialmente, a ningún terceiro sen autorización expresa do emisor salvo nos casos expresamente previstos na lei, esixindo idéntico compromiso ao persoal que empregue ou que con el colabore na execución do convenio;
- A facilitar o acceso á información unicamente ao persoal que a necesite para o desenvolvemento da devandita relación, a quen se comunicará a obrigaición de tratar a información á que se lles dá acceso con carácter estritamente confidencial;



- A aplicar medidas de cautela e protección e destruír en calquera momento a documentación escrita recibida se así o solicita a parte que a forneceu;

Considerarase información confidencial aquela á que as partes asinantes accedan en virtude do presente convenio, especialmente a de tipo técnico ou tecnolóxico, administrativa, ou económico-financeira, sempre que non teña carácter público ou notorio. Este deber manterase aínda despois de finalizada a relación que vincula ás partes.

Vixésimo terceira. Normativa aplicable

O presente convenio de colaboración rexerese especialmente por:

- A Lei 9/2007, do 13 de xuño, de subvencións de Galicia e o Decreto 11/2009, do 8 de xaneiro, polo que se aproba o seu regulamento.
- O Decreto 252/2011, do 15 de decembro, polo que se crea a Axencia para a Modernización Tecnolóxica de Galicia e se aproban os seus estatutos.
- O Acordo adoptado polo Consello da Xunta de Galicia na súa reunión do día 27 de marzo de 1991 e feito público mediante Resolución da Consellería de Economía e Facenda de data 8 de abril de 1991, sobre convenios de cooperación con outros entes públicos e de colaboración con particulares.
- A Lei 1/2016, de transparencia e bo goberno
- O Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia.
- A achega económica outórgase ao amparo do disposto no Regulamento (CE) 2023/2831 da Comisión, do 13 de decembro de 2023, relativo á aplicación dos artigos 107 e 108 do Tratado de funcionamento da Unión Europea ás axudas de minimis (DOUE-L-2023-81820).

E, en proba de conformidade, asíñase o presente convenio no lugar indicado no encabezamento

O director da Axencia para a
Modernización Tecnolóxica de Galicia

O presidente da Federación Galega de
Asociacións Universitarias Séniors

Julián Cerviño Iglesia

Alejandro Otero Davila



ANEXO I

INDICADORES A REPORTAR EN RELACIÓN AO CUMPRIMENTO DOS OBXECTIVOS DO CONVENIO:

Indicador	Valor acadado
Nº total de asistentes ás sesións de inspiración	
Nº total de sesións de inspiración realizadas (co detalle da data e lugar de celebración)	
Nº total de asistentes ás sesións de inspiración (diferenciando entre as vías de retransmisión: presencial e online)	
Nº de videopílulas elaboradas	
Nº de podcast elaborados	
Nº de infografías postas a disposición	
Nº de experiencias gamificadas realizadas	
Nº de accións presenciais de comunicación levadas a cabo	
Nº de accións online de comunicación levadas a cabo	

OUTROS INDICADORES A REPORTAR A EFECTOS ESTADÍSTICOS:

Indicador	Valor acadado
Nº de asistentes por rango de idade, por sexo e por concello de residencia ás sesións de inspiración	
Nº de asistentes por rango de idade, por sexo e por concello de residencia ás sesións de inspiración diferenciado entre as vías retransmisión: presencial e online	
Nº de persoas asistentes, por sexo, con discapacidade ás que se facilitase a accesibilidade ás actividades realizadas.	

